

嘉業堂
叢書

王荊公詩文注

第六冊

王荆公文集注卷七

吳縣沈欽韓撰

戶部郎中贈諫議大夫曾公致堯墓志銘故今爲南豐人獨醒雜志按干姓篇曾氏望出廬陵自孔門點參元西之後至漢纔有尙書郎偉一人而江西之曾居廬陵尤多

太平興國八年舉進士中第長編八年正月壬戌兩京諸道州府貢士一萬二百六十人甲子命中書舍人宋白等十人權知貢舉三月丙子上御講武殿覆試禮部貢舉人擢進士長沙王世則而下百七十五人諸科五百一十六人遂並爲定制

知淮陽軍九域志太平興國七年以徐州下邳宿遷二縣置淮陽軍

至建安軍行漕隆平集大中祥符二年升建安軍爲眞州眞宗紀大中祥符六年三月乙卯建安軍鑄玉皇聖祖太祖太宗尊像成以丁謂爲迎奉使升建安軍爲眞州

兩浙轉運副使容齋四筆曾致堯爲兩浙轉運使上言去歲所部惟秋租湖州郡督納及期而蘇常潤三州悉有逋負請各按賞罰太宗以江淮頻年水災蘇常特甚致堯所言刻薄不可行因詔戒之使倍加安撫勿得騷擾

克畏可畏也語轉而然唐書音訓外國可汗可亦讀作克字

楊允恭督揚子運楊允恭傳漢州綿竹人乾德中補殿前承旨改內殿崇班時緣江多賊命督江南水運因捕寇黨以功轉洛苑副使江淮兩浙都大發運擘畫茶鹽捕賊事

大臣議棄銀夏以解之長編至道三年十二月辛丑先是上訪宰相以靈武事宜參知政事李至上疏言先帝厭代陛下肇位赦繼遷之罪不問待之如初以厚利啗之以重爵悅之安敢迷而不復今靈州不可堅守萬口同議非臣獨然皆以爲移朔方軍額于環州且彼之戶

口四千有餘今則不盈數百矣彼之租課四十五萬二千有餘今則無子遺矣安可復守之於是李繼遷遣使修貢求備藩任上從其請復賜姓名官爵甲辰以銀州觀察使趙保吉爲定難軍節度使初刑部郎中知揚州王禹偁準詔上疏言今北有契丹西有繼遷繼遷旣未歸命饋餉固難寢停關輔之民倒懸尤甚宜下詔赦繼遷之罪復與夏臺此亦不戰屈人之師也疏奏用其策以夏綏銀宥靜五州賜趙保吉咸平元年二月乙未吏部郎中田錫上言李繼遷不合與夏州又不合呼之爲趙保吉雖賜姓與名己自先朝然狼子野心終是異類昨以陛下登極雖來進奉錫之優詔獎以來王則可錫

之士宇授以節旄則非以臣愚蒙料彼變詐必不肯久奉朝命惠懷之而弗來討除之而未得臣謂關輔勞擾從此生是時事外誤之大者按錫所言與致堯正同

議臣請棄靈州勿事謂張洎田錫

案田錫不主棄

李至王禹偁

楊億等而宰相李沆主之也沆傳中外咸以爲靈州乃必爭之地苟失之則緣邊諸郡皆不可保帝然之訪于沆沆曰繼遷不死靈州非朝廷有也莫若遣使密召州將部分軍民空壘而歸如此則關右之民息肩矣長編二年六月戊午秘書丞何亮往靈州經度屯田及還上安邊書曰臣竊料今之議邊事者不出三途以靈武居絕塞之外宜廢之以休中國飛輓之費一也輕議興師

深入窮追二也厚之以恩守之以信姑息而羈縻之三也臣以爲靈武入絕塞有飛輓之勞無毛髮之利然地方千里表裏山河水深土厚草木茂盛眞放牧耕戰之地一旦捨之以資戎狄則以梗中國此戎狄之患未可量者請城溥樂耀德二城以通糧道而扼其往還要害之路靈武阻隔旱海居絕塞之外不城溥樂耀德爲之唇齒則戎狄之患亦未可量與舍靈武無異今特城二城而賊不敢動則可建溥樂爲軍耀德爲寨嚴其刁斗堅其守備募天都之貧民營田于塞下以益軍儲然後謹擇將帥以恩信撫臨之則數十世之利也四年十二月陝西轉運使劉綜聞朝議欲棄靈州奏疏曰國家財

力雄富士卒精銳而未能翦除凶惡者誠以賞罰未行而所任非其才也今或輕從羣議遂棄靈州是縱賊之姦計矣且靈州民純土沃爲西陲巨屏所宜固守以爲扞蔽然後于蒲洛河建軍城屯兵積糧爲之應援此暫勞永逸之勢也況鎮戎軍與靈州相接今若棄之則原渭等州益須設備較其勞費十倍而多則利害之理昭然可驗矣

案蒲洛卽薄樂

大臣或忌之李沆傳眞宗問治道所宜先沆曰不用浮薄新進喜事之人此最爲先問其人曰如梅詢曾致堯等是矣長編咸平三年十月庚午以職郎中直秘閣黃夷簡爲光祿少卿主客員外郎直史館曾致堯爲戶部

員外郎先是宰相張齊賢薦夷簡致堯宜掌詔命嘗有急制值舍人已出院卽封除目命夷簡草之議者以爲不可于是召試詞亦不工故但進秩而已

陳彭年議遣使行諸部減吏員陳彭年傳太平興國中舉進士在場屋閒頗有雋名嘗跨驢出游構賦自東華門至闕前已口占數千言咸平三年屢上疏言事召試學士院遷秘書丞知金州四年上疏其事有五一置諫官二擇法吏三簡格令四省冗員五行公舉按此云行諸部減吏員蓋卽所陳省冗員也

王均誅命公撫蜀長編咸平三年正月己卯朔神衛軍士趙延順等八人殺益州鈐轄符昭壽據甲仗庫取兵

器知州牛冕及轉運使張適縋城出奔漢州都虞候王均招安卽率眾踴躍奉均爲主均僭號大蜀改元化順署置官以神衛小校張鐸爲謀主辛巳率眾陷漢州牛冕等奔東川甲午以戶部使工部侍郎雷有終爲瀘州觀察使知益州兼提舉川峽兩路軍馬招安巡檢捉賊轉運公事御廚使李惠洛苑使石普供備庫副使李守倫並爲川峽兩路捉賊招安使帥步騎八千往討之至九月甲午克其城均領餘眾出萬里橋門突圍而遁十月王均由廣都略陵榮趨富順監所過斷橋塞路焚倉而去雷有終先命知蜀州供奉官閤門祇候楊懷忠領虎翼軍追之先是朝廷每歲孟冬朔詔富順監具酒肴

稿內屬蠻酋是日纔設具而均黨適至皆就食焉懷忠
追騎入城均方在監署其黨多醉均窮蹙縊死虎翼軍
校魯斌斬其首以詣懷忠四年八月上以巴蜀遐遠時
有寇盜丁卯命戶部員外郎直史館曾致堯太常博士
王勗供備庫史潘惟吉原注雜記云惟吉周世祖子太祖令潘美養之通事舍
人焦守節分往川峽諸州提舉軍器察官吏能否致堯
誤留詔書于家惟吉教致堯上言渡吉柏江舟破亡之
以自解致堯曰爲臣不欺其君吾不忍爲也乃上書自
劾釋不問其後惟吉又見具言致堯所以自劾者上嗟
歎久之

李繼遷再圍清遠靈武方輿紀要慶陽府環縣北有清

遠城

丞相引公爲判官長編咸平四年八月庚子李繼遷抄劫邊部益甚上以邊臣玩寇朔方餉道愈艱辛丑命兵部尙書張齊賢爲涇原儀渭邠鄜延保安鎮戎清遠等州軍安撫經略使知制誥梁顥副之卽日馳騎而往按齊賢先以三年十一月罷相此稱丞相亦誤

王超旣以都部署爲之主按長編王超以四年六月己卯爲鎮定高陽關副都部署閏十二月甲午復以超爲西面行營都部署環慶路都部署張凝副之領步騎六萬以援靈州五年正月甲辰以右僕射張齊賢爲邠鄜環慶涇原儀渭鎮戎軍經略使判邠州令環慶涇原兩

路及永興軍駐泊兵並受齊賢節度此所敘乃五年齊賢再爲經略時事也

丞相敏中以非功德進官向敏中傳咸平初拜兵部侍郎參知政事爲河北河東安撫大使所至訪民疾苦宴犒官吏長編咸平四年正月庚寅以本官同平章事

清遠靈武踵亡長編咸平四年八月丙寅李繼遷率眾攻清遠軍知軍劉隱監押丁贊等分兵拒守九月庚午先是上遣使諭旨于靈環清遠十州軍駐泊副都部署鄜州觀察使楊瓊曰賊若寇清遠及青岡白馬寨卽合軍與戰於是繼遷頓積石河長圍清遠清遠屢遣間使詣瓊請濟師瓊將悉出兵爲援鈴轄內園使馮守規都

監崇儀使張繼能曰敵近重兵在前則後無以繼不可
畢往乃止遣副部署潘璘都監劉文質率兵六千人赴
之且曰伺我之繼至瓊頓慶州逗留不行乙亥繼遷親
鼓其眾攻清遠南門其子阿伊克攻北門堙壕橋以進
城遂陷賊踰支子平泊青岡城下瓊與守規繼能始出
師聞清遠陷益怯賊進至望梅原知環州王懷普巡青
岡寨謂瓊曰此寨水泉遠不可多屯師師少卽不可守
願棄之瓊等合謀焚糧廩器仗驅寨中老幼以出退保
洪德寨五年三月李繼遷大集蕃部攻陷靈州知州內
客省使裴濟死之濟在靈州凡二年謀輯八鎮興屯田
民甚賴焉及被圍餉道絕孤城危急濟刺指血染奏求

三才集卷一
救大軍訖不至城遂陷戊申西南部署司以聞宰相等
上表待罪

陳省華子堯咨受請殿上爲姦以第昇舉人敗陳堯佐
傳父省華字善則事孟景爲西水尉蜀平授隴城主簿
累遷櫟陽令徙樓煩令端拱三年太宗親試進士伯子
堯叟登甲科

狀元

占謝詞氣明辨太宗顧左右曰此誰子

王沔以省華對卽召省華爲太子中允終左諫議大夫
堯咨字嘉謨舉進士第一授將作監丞通判濟州擢右
正言知制誥山堂考索後集景德二年四月丁酉樞密
直學士劉師道責授忠武行軍司馬知制誥陳堯咨責
授單州團練副使先是師道弟幾道舉進士禮部奏名

將廷試近制悉餉名校等堯咨爲考官教幾道于卷中密爲識號幾道旣擢第或告其事詔落籍永不預舉按淳化三年將作監丞陳靖疏請餉名

揚州守職田歲常得千斛職官志唐制內外官各給職田五代以來遂廢咸平中定制以官莊及遠年逃亡田充悉免租稅佃戶以浮客充所得課租均分如鄉原例州縣長吏給十之五自餘差給其兩京大藩府四十頃次藩鎮三十五頃防禦團練州三十頃中上刺史州二十頃下州及軍監十五頃邊遠小州上縣十頃中縣八頃下縣七頃轉運使副十頃兵馬都監押砦主釐務官錄事參軍判司等比通判幕職之數而均給之清波別

志初天下職田無月日之限赴官多以先後爲爭水田

限四月三十日陸田限三月十日因著爲令從翰林學

士權開封府胥偃

宋史有傳其女嫁歐陽永叔

之請也湘山野錄天

聖九年二月敕國家均敷職田以厲清白向因僥幸遂

行停罷風聞搢紳之間持廉守道者甚眾苦節難守宜

悉仍舊貫審官三班院流內銓今後將有無職田處均

濟公平定奪差遣不得私徇長編寶元二年二月癸亥

吏部流內銓言舊選人並以有無職田注官而州縣所

上頃畝多不實今以諸路物價貴賤定爲三等京東西

湖北淮南兩浙河南幕職令錄以歲收百五十石判司

主簿尉百石陝西河東荆湖福建廣南幕職令錄以二